



SEGEN

ÜBER DIE ERDN MUASST BARFUASS GEHN.
ZIAG D'SCHUACH AUS, DIE MACHEN DI BLIND!
DANN KANNST DEN WEG MIT DIE ZECHN SEHN,
DES WASSER, DEN WIND..

SOLLST MIT DIE SOHLN AUF D'STOANER STEIGN,
MIT DER NACKERTEN HAUT.
WIRD DIR DIE ERDN AA BALD ZEIGN,
DASS S'DIR VERTRAUT.

GSPÜR DES NASSE GRAS AUF DIE FÜASS,
GSPÜR, WIA TROCKEN IS DER STAUB.
GSPÜR, WIA DICH STREICHELT DES MOOS SO SÜASS,
GSPÜR, WIA'S KNISTERT IM LAUB.

IN'N BACH MUASST EINESTEIGN,
DURCHS WASSER MUASST AUFEGEHN,
UNTERN WASSERFALL MUASST DI STELLN, MIT'M GSICHT IN DIE HÖH,
MIT DER WANGEN AUF D'ERD IN DIE SUNN DI LEGN.

LIEG GANZ STILL, RIACH DIE ERDN UND GSPÜR,
WIA AUFSTEIGT AUS IHR A RIESIGE RUAH.
UND DANN IS DIE ERDN GANZ NAH BEI DIR,
UND DU WAOSST, DU GHÖRST ZU ALLEM DAZUA